



職方典第二百四十八卷

兗州府部雜錄

搜神記空乘之地今名爲孔寶在魯南山之穴外有雙石如桓楹起立高數丈魯人絃歌祭祀穴中無水每當祭時灑掃以告輒有清泉自石間出足以周事旣已泉亦止其驗至今存焉

水經注泗水注泗水西南流逕魯縣分爲二流水側有一城爲二水之分會也北爲洙瀆春秋莊公九年經書冬浚洙京相璠曰杜預並言洙水在魯城北浚深之爲齊備也南則泗水夫子教於洙泗之間今於城北一水之中卽夫子領徒之所也從征記曰洙泗二水交於魯城東北十七里闕里背洙泗牆南北一百二十步東西六十步四門各有石閘北門去洙水百步餘後漢初闕里荆棘自闕從講堂至九里鮑永爲相因修饗祠以誅魯賊彭豐等郭緣生言泗水在城南非也余按國語宣公夏濫於泗淵里革斷罍棄之韋昭云泗在魯城北史記家記王隱地道記咸言葬孔子於魯城北泗水上今泗水南有夫子冢春秋孔演圖曰鳥化爲玉孔子奉以告天赤爵銜書上化爲黃玉刻曰孔提命作應法爲赤制說題辭曰孔子卒以所受黃玉葬魯城北卽子貢廬墓處也譙周云孔子死後

魯人就冢次而居者百有餘家命曰孔里孔藁子曰夫子墓塋方一里在魯城北六里泗水上諸孔
氏封五十餘所人名昭穆不可復識有銘碑三所獸碣具存皇覽曰弟子各以四方奇木來植故多
諸異樹不生棘木刺草今則無復遺條矣泗水自城北南逕魯城西南合沂水沂水出魯城東南尼
丘山西北山卽顏母所祈而生孔子也山東一十里有顏母廟山南數里孔子父葬處禮所謂防墓
崩者也平地發泉流逕魯縣故城南水北東門外卽爰居所止處也國語曰海鳥曰爰居止於魯城
東門之外三日臧文仲祭之展禽議焉故莊子曰海鳥止郊魯侯觴之奏以廣樂具以太牢三日而
死此養非所養矣門郭之外亦戎夷死處呂氏春秋曰昔戎夷違齊如魯天大寒而後門與弟子宿
於郭門外寒愈甚謂弟子曰子與我衣我活我與子衣子活我國士也爲天下惜子不肖人不足愛
弟子曰不肖人惡能與國士并衣哉戎歎曰不濟夫解衣與弟子半夜而死沂水北對稷門昔圉人
塋有力能投蓋於此門服虔曰能投千鈞之重過門之上也杜預謂走接屋之桷反覆門上也春秋
僖公二十年經書春新作南門左傳曰書不時也杜預曰本名稷門僖公更高大之今猶不與諸門
同故名高門也其遺基猶在地八丈餘矣亦曰雩門春秋左傳莊公十年公子偃請擊宋師竊從雩

門蒙阜比而出者也門南隔水有雪壇壇高三丈曾點所欲風舞處也高門一里餘道西有道兒君碑是魯相陳君立昔曾參居此阜不入郭縣卽曲阜之地少昊之墟有大庭氏之庫春秋豎牛之所攻也故劉公幹魯都賦曰戢武器於有炎之庫放戎馬於巨野之垌周武王封姬旦於曲阜曰魯秦始皇二十三年以爲薛郡漢高后元年爲魯國阜上有季氏宅宅有武子臺今雖崩夷猶高數丈臺西百步有大井廣三丈深十餘寸以石壘之石以磬制春秋定公十二年公山不狃帥費攻魯公入季氏之宮登武子之臺也臺之西北二里有周公臺高五丈周五十步臺南四里許則孔廟卽夫子之故宅也宅大一頃所居之堂後世以爲廟漢高祖十三年過魯以太牢祀孔子自秦燒詩書經典淪缺漢武帝時魯恭王壞孔子舊宅得尙書春秋論語孝經時人已不復知有古文謂之科斗書漢時祕之希有見者於時聞堂上有金石絲竹之音乃不壞矣廟屋三間夫子在西面東向顏母在中間南面夫人隔東一間東向夫子牀前有石硯一枚作甚朴云平生時物也魯人藏孔子所乘車於廟中是顏路所請者也獻帝時廟遇火焚之永平中鍾離意爲魯相到官出私錢萬三千文付戶曹孔詵治夫子車身入廟拭几席劍履男子張伯除堂下草土中得玉璧七枚伯懷其一以六枚白意

意令主簿安置几前孔子寢堂牀首有懸甕意召孔訴問何等甕也對曰夫子甕也背有丹書人勿敢發也意曰夫子聖人所以遺甕欲以懸示後賢耳發之中得素書文曰後世修吾書董仲舒護吾車拭吾履發吾笥會稽鍾離意壁有七張伯藏其一意卽召問伯果服焉魏黃初二年文帝令郡國修起孔子舊廟置百夫吏卒廟有夫子像列二弟子執卷立侍穆穆有詢仰之容漢魏以來廟列七碑二碑無字栢猶茂廟之西北二里有顏母廟廟像猶嚴有修栢五株孔廟東南五百步有雙石闕卽靈光之南闕北百餘步卽靈光殿基東西二十四丈南北十二丈高丈餘東西廊廡別舍中間方七百餘步闕之東北有浴池方四十許步池中釣臺方十步池臺悉石也遺基尙整故王延壽賦曰周行數里仰不見日者也是漢景帝程姬子魯恭王之所造也殿之東南卽泮宮也在高門直北道西宮中有臺高八十尺臺南水東西一百步南北六十步臺西水南北四百步東西六十步臺池咸結石爲之詩所謂思樂泮水也泮水又西逕圓丘北丘高四丈餘泮水又西流昔韓雉射龍於斯水之上尸子曰韓雉見申羊於魯有龍飲於泮韓雉曰吾聞也出見虎搏之見龍射之今弗射是不得行吾聞也遂射之泮水又西右注泗水者也

洙水西南流盜泉水注之泉出卞城東北卞山

之陰尸子曰孔子至於暮矣而不宿於盜泉渴矣而不飲惡其名也故論撰考識曰水名盜泉仲尼不漱卽斯泉矣

河水又與鄧里渠水上承大河於東阿縣西東逕東阿縣故城北故衛邑也應仲瑗曰有西故稱東魏封曹雄爲侯國大城北門內西側阜上有大井其巨若輪深六七丈歲嘗糞膠以貢天府本草所謂阿膠也故世俗有阿井之名縣出佳繒繅故史記云秦昭王服太阿之劍阿繒之衣也

鄒水西南逕蕃縣故城南又西逕薛縣故城北地理志曰夏車正奚仲之國也竹書紀年梁惠成王三十一年邳遷於薛改名徐州城南山上有奚仲冢晉太康地記奚仲冢在城南二十五里山上百姓謂之神靈也齊封田文於此號孟嘗君有惠喻今郭側猶有文冢結石爲郭作制巖固瑩麗可尋行人往還莫不逕觀以爲異見矣鄒水又西逕仲虺城北晉太康地記曰奚仲遷於邳仲虺居之以爲湯左相其後當周晉稱侯後見侵削霸者所絀爲伯任姓也應劭曰邳在薛徐廣史記音義曰楚元王子郢以呂后二年封上邳侯也有下故此爲上矣晉書地道記曰仲虺城在薛城西三十里鄒水又西逕至胡陸縣入於泗故京相璠曰薛縣鄒水首受蕃縣西注山陽胡陸是也經言琅丘東誤耳

聞見後錄兗州之東有漏澤每夏中頻雨則積水彌望至秋分後聲起水中如雷一夕盡涸初不可測奇石林立或尋其下得穴水自此入李衛公平泉有石刻字曰漏澤作亭其前曰魯石有詩云魯客持相贈瓊環乃不如者竟之漏澤石也

暇日記中都縣西門榜曰講堂門父老言孔子爲宰講說之所也故以名門

筆記曹州東有雷澤山海經云澤中有雷神龍身而人頰鼓其腹則雷故名雷夏舜漁雷澤卽此今涸

銷夏鉅野金鄉山北有石洞口清涼深丈餘內鑿石作四小閣閣外一堂陞高三尺堂外兩門門外兩大閣石道長三十丈闊十有六尺世傳秦始皇避暑宮

日知錄漢魯國有薛縣史記公孫弘傳齊菑川國薛縣人也言齊又言菑川而薛並不屬二國殊不可曉正義曰表云菑川國文帝分齊置都劇括地志曰故劇城在青州壽光縣南三十一里故薛城在徐州滕縣界地理志薛縣屬魯國按薛與劇隔兗州及泰山未詳今考儒林傳言薛人公孫弘是弘審爲薛人上言齊菑川者誤耳

後漢郡國志薛本國註引地道記曰夏車正奚仲所封冢在城南二十里山上皇覽曰靖郭君冢在魯國薛城中東南陬孟嘗君冢在城中向門東向門出北邊門也詩云居常與許鄭元曰常或作嘗在薛之旁爲孟嘗君食邑史記越世家願齊之試兵南陽莒地以聚常鄒之境索隱曰常邑名蓋田文所封者魏書地形志薛縣彭城郡有奚公山奚仲廟孟嘗君冢水經注今薛縣故城側猶有文冢結石爲郭制作嚴固瑩麗可尋而史記孟嘗君傳正義曰薛故城在徐州滕縣南四十四里今淄川縣志據公孫弘傳之誤文而以爲孟嘗君封邑失之矣 又按地理志菑川國三縣劇東安平樓鄉劇在今壽光縣西南東安平在今臨淄縣東南一十里樓鄉未詳所在又高五王傳武帝爲悼惠王冢園在齊迺割臨菑東園爲悼惠王冢園邑盡以屬菑川足明菑川在臨淄之東矣今之淄川不但非薛并非漢之菑川乃般陽縣耳以爲漢之菑川而又以爲孟嘗君之薛此誤而又誤也

史記仲尼弟子傳曾參南武城人澹臺滅明武城人同一武城而曾子獨加南字南武城故城在今費縣西南八十里石門山下正義曰地理志定襄有武城清河有武城故此云南武城春秋襄公十九年城武城左氏註云泰山南武城縣然漢書泰山郡無南武城而有南成縣屬東海郡後漢書作

南城屬泰山郡至晉始爲南武城此後人之所以疑也宋程大昌澹臺祠友教堂記曰武城有四左馮翊泰山清河定襄皆以名縣而清河特曰東武城者以其與定襄皆隸趙且定襄在西故也若子游之所宰其實魯邑而東武城者魯之北也故漢儒又加南以別之史遷之傳曾參曰南武城人者勑加也子羽傳次曾子省文但曰武城而水經注引京相璠曰今泰山南武城縣有澹臺子羽冢縣人也可以見武城之卽爲南武城也孟子言曾子居武城有越寇或曰寇至盍去諸曰無萬人於我室毀傷其薪木新序則云魯人攻鄆曾子辭於鄆君曰請出寇罷而後復來毋使狗豕入吾舍戰國策甘茂亦言曾子處費則曾子所居之武城費邑也哀公八年傳吳伐我子洩率故道險從武城又曰吳師克東陽而進舍於五梧後漢志云南城有東陽城引此爲證又可以見南城之卽爲武城也南城之名見於史記齊威王曰吾臣有檀子者使守南城則楚人不敢爲寇東取泗上十二諸侯皆來朝漢書但作南成孝武封城陽共王子貞爲南城侯而後漢王符潛夫論云鄙畢之山南城之冢章懷太子註南城曾子父所葬在今沂州費縣西南此又南成之卽南城而在費之證也成化中或言嘉祥之南武山有曾子墓有漁者陷入其穴得石碣而封志之嘉靖十二年吏部侍郎顧鼎臣奏

求曾氏後得裔孫質粹於吉安之永豐遷居嘉祥十八年授翰林院五經博士世襲夫曹縣之冉堦爲秦相穰侯魏冉之家而近人之撰志者以爲仲弓如此之類蓋難以盡信也

水經注孔廟東南百五步有雙石闕故名闕里按春秋定公二年夏五月壬辰雉門及兩觀災冬十月新作雉門及兩觀註雉門公宮之南門兩觀闕也禮記昔者仲尼與於蜡賓事畢出游於觀之上史記魯世家煬公築茅闕門蓋闕門之下其里卽名闕里而夫子之宅在焉亦謂之闕黨魯論有闕黨童子荀子仲尼居於闕黨是也後人有以居爲氏者漢書儒林傳有鄒人闕門慶忌註云姓闕門名慶忌 今夫子廟庭中有壇石刻曰杏壇闕里志杏壇在殿前夫子舊居非也杏壇之名出自

莊子莊子曰孔子遊乎緇帷之林休坐乎杏壇之上弟子讀書孔子弦歌鼓瑟奏曲未半有漁父者下船而來鬚眉交白被髮揄袂行原以上距陸而止左手攜膝右手持頤以聽曲終又曰孔子乃下求之至於澤畔方將杖屨而引其船顧見孔子還鄉而立孔子反走再拜而進又曰客乃刺船而去延緣葦間顏淵還車子路授綬孔子不顧待水波定不聞桴音而後敢乘司馬彪云緇帷黑林名也杏壇澤中高處也莊子書凡述孔子皆是寓言漁父不必有其人杏壇不必有其地卽有之亦在水

上葦間依陂傍渚之地不在魯國之中也明矣今之杏壇乃宋乾興間四十五代孫道輔增修祖廟移大殿於後因以講堂舊基磬石爲壇環植以杏取杏壇之名名之耳 春秋隱二年莒人入向

杜氏解曰譙國龍亢縣東南有向城桓十六年城向無解宣四年公及齊侯平莒及邾莒人不肯公伐莒取向解曰向莒邑東海丞縣東南有向城遠疑也襄二十年仲孫速會莒人盟於向解曰莒邑按春秋向之名四見於經而杜氏註爲二地然其實一向也先爲國後并於莒而或屬莒或屬魯則以攝乎大國之間耳丞縣今在嶧杜氏以其遠而疑之況龍亢在今鳳陽之懷遠乎齊乘以爲今沂州之向城鎮近之矣 春秋莊三十二年城小穀左氏傳曰爲管仲也蓋見昭公十一年申無宇

之言曰齊桓公城穀而賓管仲焉至於今賴之而又見僖二年經書城楚丘之出於諸侯謂仲父得君之專亦可勸諸侯以自封也是不然仲所居者穀也此所城者小穀也春秋有言穀不言小者莊二十三年公及齊侯遇於穀僖二十六年公以楚師伐齊取穀文十七年公及齊侯盟於穀成三年叔孫僑如會晉荀首於穀四書穀而一書小穀別於穀也范甯曰小穀魯地然則城小穀者內城也故不繫之齊而與管仲無與也漢高帝以魯公禮葬項羽於穀城卽此魯之小穀而註引皇覽以爲

東郡之穀城與留侯所葆之黃石同其地其不然明矣春秋發微曰曲阜西北有小穀城今曹縣東南四十里有景山疑卽商頌所云陟彼景山松柏丸丸而左傳昭公四年椒舉言商湯有景毫之命者也鄘詩望楚與堂景山與京則不在此也

祖庭廣記曰周高祖親征慕容彥超至兗州城將破夜夢一人狀甚魁異被王者服城陷取委巷入適夫子廟在帝豁然曰昨夢殆夫子乎不然何路與廟會因駐蹕升堂瞻像一如夢中所見感喜下拜遂躬詣闕里拜奠詔留所奠銀酒器及爐於廟中又詣聖林拜墓勅所屬葺祠宇禁樵採

闕里志宋仁宗初卽位遣宦者李邦寧釋奠於孔子邦寧旣受命行禮方就位忽大風起殿上及兩廡燭盡滅燭臺底鐵鐫入地尺許無不拔者邦寧悚息伏地諸執事者皆伏良久風息乃成禮邦寧因慚悔累日

兗州府部外編

呂氏春秋有仇氏女子採桑得嬰兒於空桑之中獻之其君其君令燂人養之察其所以然曰其母居伊水之上孕夢有神告之曰曰出水而東走母往顧之明日見曰出水告其鄰東走十里而回視

其邑盡爲水身因化爲空桑此伊尹生空桑之故也

有仇在曹州境內

闕里祖庭廣記顏氏禱於尼丘升之谷草木之葉皆上起降之谷草木之葉皆下垂及懷妊十一月而生是夕有二龍繞室五老降庭五老者五星之精也顏氏之房聞鈞天之樂空中有聲云天感生聖子故降以和樂之音 孔子未生時有麒麟吐玉書於闕里其文曰水精之子繼衰周而爲素王顏氏異之以繡紱繫麟之角信宿而去懷妊十二月而生

十六國春秋昔魯人泛海漂泊而失津至澶州遇先聖七十子遊於海上指以歸途使告魯公築城以備寇魯人歸以告魯侯侯以爲誕俄有羣鵠數萬銜土培城侯始信乃城曲阜訖而齊寇果至廣古今五行記南宋元嘉中夏侯祖觀爲兗州刺史鎮瑕丘卒於官沈僧榮代之經年夏侯來謁僧榮語如平生每論幽冥而泣僧榮牀上有一織成寶飾絡帶夏侯曰豈能見與必以爲施可命焚之僧榮令對燒之煙焰未滅已見帶在夏侯腰上明年沈在鎮夜設女樂忽有一女在戶外沈問之答云是杜青州彈箏妓采芝杜已致夏侯兗州爲寵妾惟願坐上一妓見伴沈戲指下坐琵琶妓啼云官何忍以賜鬼鬼曰汝無多言今不相放入與同房別飲酌酒未終心痛而死死氣纔絕魂神已

復人形在采芝側

北朝魏夏侯夫字元廷歷南兖州大中正性好酒初與南人辛謏庚遵江文遙等終日遊聚酣飲之際相語謂曰人生局促何殊朝露坐上相看先後聞耳脫有先亡者於良晨美景靈前飲宴倘或有知庶共飲饗及夫卒後三月上巳諸人相率至夫靈前仍共酌飲時日晚天陰室中微闇咸見夫在坐衣服形容不異平昔時執酒杯以獻酬但無語耳夫家客雍僧明心有畏懼披簾欲出便卽僵仆狀若被毆夫從兄欣宗云今日是節日諸人憶弟疇昔之言故來同飲僧明何罪而被嗔責僧明更寤而欣宗鬼語如夫平生并責家人皆得其罪又發陰私竊盜咸有次序隋開皇八年安定李文府任兖州須昌縣丞見州故錄事孔瓚卽須昌人先亡忽白日至文府廳前再拜文府驚問何爲云泰山府君遣訪好人瓚以公明幹輒相薦舉文府憂惶叩頭瓚良久云今更爲方便慎勿漏言至十年因說之說畢須臾而死

搜神記孔子厄於陳絃歌於館夜有人長九尺皂衣高冠聲動左右子路戰於庭仆地乃大鯉魚也孔子歎曰胡爲乎來哉吾聞物老羣精依之因衰而至

論衡孔子與顏淵俱上泰山孔子望見吳閭門外繫白馬引顏淵以指之若見吳閭門乎顏淵曰見

之有若繫練之狀孔子撫其目而比之因與俱下

太平廣記唐中宗時唐公休璟爲相常有一僧言多奇中好爲厭勝之術休璟甚敬之一日謂休璟曰相國將有大禍且不遠數月然可以禳去休璟甚懼卽拜求自免之術僧曰相國當於卑冗官中訪一孤寒家貧有才幹者使爲曹州刺史必深感相國恩而可以指蹤也旣得之願以報某休璟且喜且謝遂訪於親友張君者家甚貧爲京卑官卽用爲曹州刺史召僧語之僧曰張君赴郡之時當令求二犬高數尺而神俊者休璟唯之張君至郡果得二犬以獻高數尺而肥其臆厚尺神俊異常休璟大悅召僧視之僧曰善育之脫相君之禍者二犬也後旬日其僧又至謂休璟曰事在今夕願相君嚴爲之備休璟卽留僧宿是夜休璟坐於堂之前軒命左右十餘人執弧矢立於榻隅僧與休璟共處一榻至夜分僧笑曰相君之禍免矣可以就寢休璟大喜且謝之遂徹左右與僧寢焉追曉僧呼休璟偕尋其跡至後園中見一人仆地而死其頸有血二犬在樹下仰視一人袒而匿其上休璟驚且詰之其人泣而指死者曰某與彼俱賊也昨夕偕來且將致害相國遇此二犬躡於樹下彼因其噬而死某懼而匿伺其他去將逃焉追曉終不去今甘死矣休璟召左右縛之僧曰彼罪固當

死然非其心也蓋受制於人耳願釋之休璟命解其縛賊拜泣而去

靈怪錄兖州王鏐性剛鷙無所憚畏常凌侮鬼神開元中乘醉往莊去郭三十里會日暮長林下見一婦人問鏐所往請寄一襪而忽不見乃開襪觀之皆紙錢枯骨之類鏐笑曰愚鬼弄爾公策馬前去忽遇十餘人相聚向火時天寒日已昏鏐下馬詣之話適所見皆無應者鏐視之向火之人半無頭有頭者皆有血衣鏐驚懼上馬馳去夜艾方至莊莊門已閉頻敲無人出纔大叫罵俄有一奴開門鏐問曰奴婢輩今並在何處奴云十日已來一莊七人疾病相次死盡鏐問汝且如何答曰亦已死矣向者聞郎君起屍來耳因忽顛仆卽無氣矣鏐大懼走投別村而宿周歲卒

太平廣記李師古治山亭掘得一物類鐵斧頭時李章武遊東平師古示之武驚曰此禁物也可飲血三斗驗之而信 李全質隴西人少在沂州一日昧爽之郊假寢於州城橫門東庭前忽有一

人衣紫衣戴元笠直造其前曰奉追全質曰何人相追紫衣人曰非某相追別有人奉追也全質曰公莫有所須否答曰犀佩帶一條耳全質曰唯遂令畫犀帶一條日晚具酒脯紙錢於橫門外焚之是夜全質纔寐卽見紫衣人拜謝曰蒙賜佩帶無以奉答然公平生水厄但危困處某必至焉洎太

和歲初大水全質爲天平軍裨將有公務自中都抵梁郡城西水深而冰薄程命峻速片時不可駐行從等面如死灰信轡委命而行纔數步見紫衣人從後大呼曰勿過彼而來此吾知其徑安而且捷全質荷之反轡而從焉不三里曾無尺寸之阻得達本土酬以財物固讓不取須臾忽失所在蓋橫門之神也 寇萊公愛妾舊桃隨公南遷及再徙沱州舊桃泣曰妾前世師事仙人今將辭去敢有所託願葬杭州天竺寺公詰曰吾去何之桃答曰妾向不敢言恐泄陰理今已去矣言亦無害公當爲下世主者閻浮提王也然公亦無幾於世矣後有僧克僅見公曹州境上擁驢北去克僅詢後騎曰公將何往曰閻浮提王交政也

爲善書宋蔡居厚知鄆州有梁山濞劫賊五百餘來降居厚悉戮之明年以兵部侍郎奉祠金陵疽發於背命道士禳謝因令所親王拱代作請詞明日居厚卒拱亦卒旣而拱復生曰適到陰司主者責之拱曰皆居厚命拱但行詞而已俄見數鬼引出居厚枷繫連貫極爲枯瘠遙告拱曰子歸卽語吾夫人令急救我我在此祇是理會鄆州一事耳

夷堅志衛淵鄆州東阿人嗜酒成疾盛夏醉臥牖下夢身遊他所或報沉湎國入寇居民散走淵倉